

26 MAR 1999

Azhar-Raya

AZHAR UCAP SELAMAT HARI RAYA HAJI KEPADA SEMUA RAKYAT M'SIA

LANGKAWI, 26 Mac (Bernama) -- Juaraan Malaysia, Azhar Mansor, yang sedang dalam perjalanan untuk mencatat dua rekod baru belayar mengelilingi dunia, mengucapkan "Selamat Hari Raya Aidil Adha" kepada rakyat Malaysia, khususnya masyarakat Islam.

"Saya mendapat berita daripada pangkalan darat bahawa ramai yang menghantar ucap selamat melalui e-mel kepada saya. Saya terharu dan ingin mengucapkan terima kasih di atas minat dan sokongan mereka itu," katanya dalam e-melnya ke pangkalan daratnya di hotel Awana Porto Malai di sini hari ini.

Azhar telah menerima ucap selamat dan galakkan melalui e-mel daripada 2,000 orang dari seluruh dunia sejak beliau memulakan pelayarannya itu pada 2 Feb lepas.

Antara yang terbaru ialah daripada Datin Seri Dr Siti Hasmah Mohd Ali, isteri Perdana Menteri Datuk Seri Dr Mahathir Mohamad.

"Saya berharap suatu hari akan dapat membalas sendiri ucapan mereka itu tetapi sekarang tugas dan tanggungjawab saya perlu diberi keutamaan. Saya mengambil peluang ini untuk mengucapkan Selamat Hari Raya Aidil Adha kepada rakyat Malaysia," katanya.

Azhar melaporkan beliau membuat kemajuan yang lebih baik menuju ke Tanjung Tanduk hari ini berbanding semalam dengan tiupan angin yang agak lebih kuat sehingga 20 knot dan mencatat 150 batu nautika dalam masa 24 jam.

Tanjung Tanduk, di mana dua lautan utama -- Lautan Pasifik dan Lautan Atlantik -- bertemu, bakal memberi cabaran sengit kepada Azhar disebabkan keadaan yang tidak memihak kepadanya.

"Keadaan agak baik dengan angin yang sedang untuk membantu saya pada jarak yang panjang dan membosankan ini. Saya jauh di lautan sekarang dan darat jauh sekali," katanya.

Azhar menghabiskan sedikit masa hari ini untuk memeriksa peralatannya bagi memastikan semuanya berkeadaan baik.

Memasukii hari ke-52nya di laut, Azhar telah belayar sejauh 7,591 batu nautika dan perlu meneruskan perjalanan sejauh kira-kira 15,431 batu nautika lagi.

Beliau melaporkan kedudukan kapalnya pada Latitud 51 darjah 47' 55" Selatan dan Longitud 166 darjah 35' 62" Barat.

Azhar telah belayar selama 1,247 jam dan 15 minit sejak bertolak dari Langkawi pada 2 Feb.

Beliau berazam untuk mencatat dua rekod belayar mengelilingi dunia secara solo dan tanpa henti melalui laluan baru barat ke timur yang ditetapkan oleh Majlis Rekod Kelajuan Pelayaran Dunia di Britain, dan terpanjang dengan kapal 15m/18m.

Pelayaran Azhar itu adalah percubaan pertama untuk mengelilingi dunia bermula dari Lautah Hindi dengan langkawi sebagai tempat berlepas. Percubaan sebelum ini oleh pihak barat bermula dari Lautan Atlantik.

Rakyat Perancis, Christophe Auguin memegang rekod dunia mengelilingi dunia dalam masa 105 hari, 20 jam, 31 minit dan 23 saat yang dibuatnya pada tahun 1997 dengan kapal layar "Geodis".

Dalam pelayarannya itu, Azhar perlu melalui Tanjung Leeuwin di Australia, Tanjung Selatan di New Zealand, Tanjung Tanduk di Amerika Selatan, Pulau Fernando de Noronha di Lautan Atlantik, Tanjung Harapan dan balik ke Langkawi pada Jun.

-- BERNAMA  
NH WAT